

Ezhisemagak Miigaajigewin aan dash ge-izhi-gibitinamamban

Gaawiin gi-michi-bezhigosii.

Daabishkoo e-michi-bezhigod inendam ako awe gagwaadagi'ind. Gaawiin dash iwe izhisesinoon. Miziwe izhisewag owe e-gagwaadagi'indwaa awiyag, aaniindi go awenenag igo, gaawiin wiin eta gaa-gidimaagiziwaad iwe izhisesiiwag.

EZHISEMAGAG GAGWAADAGI'IWEGIN



Gikenjigaadeg iwe gaa-izhiseg miigaajige-win gi-ga-onji-gibitinaan giin.

Gaawiin wiin bizhishig miigaajigesii awe gagwaadagi'iwed. Aayaakam iwe doodam. Niiwinoon ini ge-izhi-gikendaagozid awe e-wii-miigaajiged ngwana.

Maajii-nishkendang:

- Gegoo nishki'igod daabishkoo gii-wanitood odanokiwiin maagizhaa gaye gii-odisigod ge-diba'ang, amii ge-onji-maajigidaazod. Amii e-maajii-gagwaada-gi-aad owiijii-waaganan, e-maji-inaapinemaad, e-anaamenimaad, anishaa dash igo.
- Amii ezhi-gagwe-wawaangawi'aad owiijiiwaaganan awe gagwaadagi'ind, ji-miigaanigosig.
- Biinish ani-ziindendaagwan imaa daawining, e-gagwe-manaa-nishki'ind awe gaa-okewigidaazod.

Ezhi-bashkigidaazod awe gaa-miigaajiged:

- Apii gii-baashkigidaazod awe, amii ezhi-giikaamaad owiijiiwaaganan e-miigaanaad e-oditinaad.
- Maagizhaa aabiding izhise gemaa moozhag.
- Onjida iwe doodam awe gaa-miigaajiged, gaawiin wiin anishaa iwe izhisesinoon. E-wii-gagwaadagi'aad, e-wii-gagwe-badagonaad awiyan wenji-doodang.

Daabishkoo e-debwed iwe gii-onji-doodang:

- Bakaan awi'ya' odanaamenimaa'iwe gii-doodang maagizhaa gaye gaawiin gichi-gegoo iwe ikido.
- Amii dash owe gaa-onji-doodang awe bakaan awiyan ji-anaamenimind, gaawiin wiin. Daabishkoo wiin e-debwed wiin e-gikendang wegonen wenji-maazhiseg. Biinish dash awe gagwaadagi'ind ezhi-maajii-debwetawaad gaa-ikidonid.

Minwaadiziikaazo awe:

- Apii dash gii-maajii-debwetang awe gaa-gidimaagi-ind, amii gaa-izhi-niizhiwaad igi ezhi-gagwe-minwaaji'idiwaad daabishkoo e-minoseg gakina gegoo. Geyaabi dash dagwaadagi'iwe awe gaa-okewigidaazod, giishpin maajii-dazhinjigaadesinog iweni o-miigaajigewin.

AMII MIINAWAA EZHI-MAAJISEG MIIGA AJIGEWIN.

Gaawiin da-ani-minosesinoon, Nawach da-maanzhise. Ji-wiiji'igooyeg eta da-minose.

Giinwenzh owe daa-inakamigan. Biinish awashime ani-doodam awe gaa-miigaajiged. Biinish wiinge odani-gichi-doodawaan ini gagwaadagi'aad.

Amii awe gagwaadagi'ind gaawiin odani-ganoon aasii'odinawemaagana'. Dabasenimo, maagizhaa gaye odoonji'igoon owiijiiwaaganan ji-ganoonaasig. Nawach gaye odani-zanagendaan ji-waabamaad odinawemaagana' gaye ogete-wiijiiwaagana'. Amii eta ini gaa-gagwaadagi'igod e-apenimaad, gaawiin wiin bakaan awiyan ji-apenimaad ji-wiiji'igod.

Dinookaaniwid awe gaa-gagwaadagi'iwed:

- Gechinaa gii-gagwaadagi'aa gii-abinoojiwid, gemaa o-gii-waabandaan iwe dino
- Wiinge ondendamoshki. Gidanaamenimig bakaan inini e-giimooji-wiijiwiad, gemaa gi-wiijkwemag gaye gidinawe-maaganag giniijaanisag odoondenimaa'
- Okewigidaazo. Wegonen igo onji-baashkigidaazo
- Bakaan awiyan odanaamenimaan. Gaawin wiin wiikaa ji-ikidod wiin e-gii-maajitood gii-giikaawidang
- Gii-miigaajged, gaawin iwe gichi-gegoo nitaa-ikido, maagizhaa gaye gaawin o-gii-doodanziin daa-ikido
- Minikwewin gaye odanaamendaan gegoo gii-doodang
- Memeshkwach minwaadizi, gaye e-gichi-nishkaadizid. Wiinge o-gaadoon iwe gaa-inaadizid
- Wiin odinwaadaan aaniin ge-izhi-bimaadizid ikwe, inini
- Ngoding gaye bakaan gii-onji-dakonigaazo gii-maji-doodang
- Gagwe-zegi' iwe, gagwe-zegitaagozi
- Gi-gagwe-gibitinig ji-waabamadwaa gidinawemaaganag gaye giwijiwaaganag, gaye ji-anokiiyin, gi-ando-gikino'amaagoziyin
- Gi-gagwe-dibenimig, e-wiindamaag aaniin ge-doodaman, aaniin ge-inendaman
- Gi-giikaamig, noojigo gidinaapinimig, gaye iwe gaa-doodaman gaawin gwayak iwe gidinik i
- Ishkwaa-baashkigidaazod, ngoding mawi, amii dash ekidod e-minjinawezid iwe gii-doodang. Ajina eta iwe inendam, gaawin dash nisidotanzii gaa-onji-zegiziyin
- Gii-maajii-miigaajged, bezhigwan ako izhichige. Aanind o-bakitewaan odikweman owadengong, aanind gaye aandi ge-izhi-naagwasinog gaa-gii-inaganaamaad

Inendam na ji-aanji-bimaadizid gi-wiijiwaagan? Gagwejindizon...

- Wiikaa na wiin anaamenindizo gii-ishkwaa-miigaanig, gaawin giin e-anaamenimig?
- O-waabandaan na ezhichigemaganinig omiigaajgewin, gaawin wiin eta gii-onji-giba'ond giba'odiiwigamigong, gaye gii-odaapinind? Zanaganini ji-waabandamowaad aaniin e-izhi-maanshakamigiziwaad gii-miigaajgewaad.
- Ogikendaan na aaniin ezhi-maji-doodawig gii-miigaanig, aaniin dash enishkaagoyin? Ginwenzh naanaagadawendamowin owe.
- Gi-bizindaag na, maagizhaa gaye nawach gi-nishki'aa, e-biibaagimig, noojigo e-inaapinimig?
- Ngoding na bakaan izhaa gii-maajii-nishkaadizid ji-onji-gagwe-gibitinang onishkaadiziwin?
- Giin na ako gidanaamenimig iwe gii-inaadizid, daabishkoo giin gaa-onji-inaadizid?

Gi-giimooji-gosaa na gi-wiijiwaagan? Gi-minwendaan na ewiijiwiad, gi-zoongenim na? Gi-jiikendam na?

Giiyaabi gegoo wii-gikendaman izhi-giigidon:
Manitoba Dibaakoniwewin
Gaa-gagwaadagi'indwaa gaa-izhi-wiiji'indwaa

Wiinibiigong: 945-6851
Gaa memwaach ji-diba'igeyin: 1-866-484-2846

Gaawin memwaach ji-diba'igeyin izhi-giigidoyin miigaanig gi-wiidigemaagan **(Bigo apii) 1-877-977-0007**